



08689

郭侍郎奏疏卷十二

請將黔撫岑毓英交部議處疏



奏爲雲南戕斃馬加理一案撫臣未能先事豫防應請

旨交部議處恭摺仰祈

聖鑒事竊維周官一書尤重賓禮其時九服夷蠻朝會以時迎勞宿衛各有職司辟遠無禮允爲三代之盛軌西洋各國通商已歷四十餘年沿海各省學館教習及洋槍隊訓練皆洋人司之開立口岸設關征稅一委之洋人於中國有報效之心而無猜防之意其到處遊歷載在條約原所不禁又領有照會護送而馬加理被戕

奏疏卷十二

一

一案距今已踰十月辦理尙無端倪撫臣岑毓英於此誠難辭咎臣因查馬加理來自緬甸帶有緬兵百餘人

撫臣聞其攜帶兵弁入境札飭各地方加意防堵本屬

正辦卽總兵楊玉科有鎮守之責都司李珍國有屯邊之責聞有他國兵入境亦豈能不加防範兵弁等喜事邀功遂至堵擊不獨非撫臣所及料卽楊玉科李珍國

派兵巡防亦斷不期決裂至此臣推查其原委楊玉科

駐紮騰越李珍國駐紮南甸距戕斃馬加理之蠻允地

方遠在數百里以外非有主持督率不問可知所以遽

至戕害者由撫臣未能據總理衙門來文曉諭清晰以

致楊玉科李珍國皆不及嚴示約束致生意外之變楊玉科李珍國並以百戰餘生號稱忠勇展轉貽累無以自明臣心尤竊傷之應懇

天恩先將撫臣岑毓英交部嚴加議處以明其未能先事豫防之咎而後嚴查動手戕斃馬加理各犯照例議抵庶以平外人之心而亦以見

朝廷推求事始一秉大公之至意臣蒙

恩派充總理衙門行走有言事之責而既經接任視事一切當會商辦理勢不能專銜具奏是以先期一貢其愚忱上備

奏疏卷十二

二

聖明採擇所有雲南撫臣應先行議處緣由謹繕摺具陳伏乞

皇太后

皇上聖鑒訓示謹

奏

鄙人橫遭訾毀爲京師士大夫所不容所據爲罪狀者卽此疏也軍機章京亦以發端引周禮爲立言不倫鄙心竊獨怪之士大夫徒以岑公殺斃一洋人力謀保全此疏不獨保全岑毓英竝楊玉科李珍國皆極力爲之洗刷以保全之而以未能先事豫防議處

岑毓英科罪極輕藉以稍平洋人之氣議罪一二兵
丁有餘使樞府能知此義騰越及宜昌各處通商可
以不置議亦必無今日法人之禍矣今時督撫一劾
便動獨一謀殺洋人卽微過亦不肯以加之而又無
辭以折服洋人人才如此求無誤國病民不可得矣
因檢疏稿得此竝錄存之庶稍見當日所以用心而
辦理洋務之不得其平亦由士大夫太無學識之過
也

奏疏卷十二

擬銷假論洋務疏

奏爲

臣

假期將滿遵

旨帶病銷假謹就所知洋務情形恭摺具陳仰祈

聖鑒事竊

臣

因病兩次乞假回籍渥荷

天恩優賞假期於時滇案辦理已有端倪而

臣

病久未

痊分當求退五月二十四日英使威妥瑪貿然出京滇

案未能議結

臣

豈遽能置身事外自應勉強支持暫請

銷假而見在辦理洋務機宜有可一言其略者伏查夷

狄爲患中國自古皆然所以控御之方戰守和三者而

已彼其侵擾有常所其盛衰有定勢因時制變應之有

奏疏卷十二

四

餘洋人以通商爲義環列各海口深入長江數千里藉
釁生端以求便利名爲外憂而負隅實在內地名爲敵
國而構禍不出邦交故

臣

以爲今日之洋務戰守和三

者俱無可言何以言之凡戰有二曰攻剿之師曰應敵

之師西洋各國遠隔數萬里中國不能往攻明矣而如

洋人練兵製器之精其君臣相與講求日新月異未嘗

稍息而獨不肯輕易用兵其視通商各口皆其利藪意

尤護惜之彼不言戰何爲迫使戰乎凡和有三曰定歲

幣之等差曰議聘使之禮節曰辨稱號之崇卑洋人通

商二十餘年從未較論及此咸豐七年廣東用兵而上

海甯波通商如故次年天津用兵卽廣東通商亦復如故其苛索兵費但以爲因此用兵兵費卽取償於此始終通商而已每一滋事增加口岸徧據要害所爭莫大於是更不得以和論至於守之爲義由皇古至於今日由天下至於一家莫能廢也中國沿海九千餘里大小百數十口虎門大沽竝稱天險道光二十五年三口通商以後洋務辦理已有成局增修虎門礮臺爲善後之計費至數百萬咸豐七年洋人直入一毀無餘咸豐九年天津防堵極良將勁兵高壘巨礮之用終亦不能持久至於廣東展轉貽誤而有甯波之失金陵展轉貽誤而有鎮江之失延及咸豐七年廣東省城爲洋人襲入擾及天津洋務遂至窮於辦理此其成蹟亦略可觀矣今日且徧及內地設立公使駐紮京師曾無藩籬之隔故臣以爲守者經國之常略而非目前防海之勝算也竊謂辦理洋務一言以蔽之曰講求應付之方而已矣應付之方不越理勢二者勢者人與我共之者也有彼所必爭之勢有我所必爭之勢權其輕重時其緩急先使事理了然於心彼之所必爭不能不應者也彼所必爭而亦我之所必爭又所萬不能應者也宜應者許之更無遲疑不宜應者拒之亦更無屈撓斯之謂勢理者所

以自處者也自古中外交兵先審曲直勢足而理固不能違勢不足而別無可恃尤恃理以折之伏見列朝平定準噶爾布魯特方略以

至仁誅暴逆而坦然一示以誠招攜懷柔委曲深至乾隆二十九年西疆烏什之叛辦事大臣蘇誠已戕於賊追咎肇釁之由譴及其子孫嘉慶二十五年回疆之變參贊大臣斌靜經回民控訴逮問治罪道光二十九年甘肅誘殺撒拉番民亦經控訴逮問督臣琦善所屬回番各部拊循理處務使持平惟恐一夫稱屈允爲

列聖控制中外之成規深求古今得失之故熟察彼此

奏疏卷十二

六

因應之宜斯之謂理臣惟洋人之強與其逼處中國爲害之深遠過於前代而其借端陵藉乘釁要求中國與之相處其情事亦絕異於前代處之得其法其於各口稅務及學館教習及練兵製器諸大端洋人相與經營贊畫未嘗稍有猜忌處之不得其法則議論繁多變故滋生往往小事釀成大事易事變成難事以致貽累無窮竊見辦理洋務三十年中外諸臣一襲南宋以後之議論以和爲辱以戰爲高積成數百年氣習其自北宋以前上推至漢唐綏邊應敵深謀遠略載在史冊未嘗省覽洋人情勢尤所茫然無能推測其底蘊而窺知其

究竟

朝廷設立總理衙門專辦洋務亦不能不內惜人言周

章顧盼無敢直截辦理臣以愚庸爲眾論所詬譏何敢

再有陳奏然竊計今時關係天下利病無過於洋務直

隸督臣李鴻章兩江督臣沈葆楨福建撫臣丁日昌練

習洋務至精至博用能力求富強之術而於交涉洋務

亦皆深得體要維持保全如臣才識短乏而自道光二

十二年辦理洋務據所見聞證以前代事蹟深有悟於

中外交接之義沛然不疑於心疾病昏愚無能自效而

其理固有可言者謹就今日辦理洋務機宜略具四條

奏疏卷十二

七

可以見之施行伏候

聖明採擇

一

國家設立軍機處爲出政之所中外事機悉歸裁定咸

暨十一年總理衙門之設一倣軍機處章程遂與軍機

處並立其時恭親王實司總理可以專制兼因交涉洋

務多持正義不願與聞今已辦理十餘年矣察看西洋

大勢總理衙門當遂爲

國家定制頒發

上諭及一切處置事宜不能不歸軍機處軍機大臣未

經奉派總理衙門行走茫然莫知其原委是非得失無從推求臣愚以爲軍機大臣皆應兼總理衙門銜名庶幾討論情勢通籌熟計以期有所裨益

一西洋通商向止廣東一口嗣是沿海開口以及奉天內達江西湖北法蘭西分踞安南與廣西接壤俄羅斯出入西北各口徧及陝甘及山西英吉利又議雲南通商其四川貴州河南交涉教案層見疊出目前無洋務交涉獨湖南一省耳必能諳悉洋情辦理始能裕如於此稍有惶惑一視若荆棘之在其身其始過持正論其後展轉翻異迷惑必多故今日人才以通知洋務爲尤

奏疏卷十二

八

要自與洋人通商以來事變數出多因華洋交涉案件爭辨紛紜而辦理歸結處總在訛索賠款廣開口岸此其命意之所在無知豫防者動輒積嫌生釁激成事端展轉以資其挾制而使遂其欲推原其故由地方官不知洋情旣以構釁爲能而多加之粉飾又以了案爲屈而更益以推延似此情形施之民間訟案含忍受冤卽亦無辭施之洋人必至多生事故故臣以爲考求洋務亦無他義通知事理而已矣漢詔出使絕國與將相竝重當時所急者不過折衝樽俎一日之間實不逮西洋關繫緊要之萬一伏願

皇上考攬人才勤求方略期使中外諸臣勿存薄視遠人之心以洞知其得失利病之原忍辱負重刻自砥礪以激厲士大夫之心而獎成士民奮發有爲之氣外籌應接之術內立富強之基在

朝廷一念之斡旋而已

一駐紮西洋公使萬非今日急務其閒惟美利堅之金山中國流寓數萬人左近必嚙及西班牙所屬之古巴兼有招工事宜足資辦理此外各國全無憑藉而特數萬里外之使臣因事與之辨爭事理稍有虛飾困辱立見卽有能者亦徒以有用之才虛棄之無用之地將來

奏疏卷十二

九

海道開通中國商人能赴各國設立行棧有可經理之事漸次選派大員充當公使駐紮自不可少此時出使通好委無關繫而既經奉派出使英國各國相沿爲例正慮此後出使歲必加多臣以爲考求洋務中外諸臣必宜畱意而出使則盡人可以差遣竊計各部寺院二三品以下堂官類能諳悉體制講求應對

朝廷以息事安人爲心奉

命出使誰敢不盡力應請以後選派使臣依照常例由禮部開列二三品以下堂官年歲不滿五十者聽候欽派亦與尋常出使同等期使廷臣相習爲故常不至

意存輕重而於洋情事勢亦不能不加研考以求備
國家緩急之用其爲裨益必多矣

一西洋公法通商各國悉依本國法度中國刑例有萬
非西洋所能行者當時定議條約未能做照刑部例案
酌添通商事例以致會審公所一依西洋法度以資聽
斷中國一切無可據之勢惟當廓然示以大公凡租界
滋事依洋法辦理州縣地方滋事依中法辦理其視洋
民猶中國之民視辦理洋案亦猶辦理中國之案先期
化除畛域之見以存中國一視同仁之體其間交涉洋
務

奏疏卷十二

十一

上諭奏摺應發鈔者概行發鈔使天下曉然知事理之
平其有委曲周旋亦能窺見

朝廷之用心以知事理之得失非獨以釋士民之疑亦
足以折服洋人之氣矣

以上四條於辦理洋務要略未能詳及而先務通知古
今之宜以求應變之術熟覽中外之勢以息人言之囂
自可漸次講求控御之方推行富強之計要求其歸理
勢二者深籌遠攬無以逾焉者也有宋大儒程頤論事
必折衷一是其言當時朝廷有五不可及一曰至誠待
敵國夫能以誠信待人人亦必以誠信應之以猜疑待

人人亦卽以猜疑應之此理無或爽者方今時勢艱難財力支絀洋案多一反覆卽

國家多傷一分元氣維持國體全在先事防維事端一出補救無從此後更難與處臣久病衰頹委無材用足應

國家之急斷不敢希圖以言語效用供人指摘審量洋情事勢則實有確不可易者冒昧上陳言辭拙直不勝戰慄隕越之至所有見在辦理洋務情形謹就所知繕摺具陳伏乞

皇太后

奏疏卷十二

十一

皇上聖鑒訓示謹

奏

案是時英國公使威妥瑪出都 廷旨令直督節相

李公江督沈公與議戕斃馬加理一案皆未有以應

也嵩燾時方求免出洋以事勢且棘謀遂以身任之

先具一疏銷差論次辦理洋務源流本末以求解於

人言刑部司員劉錫鴻守爭三日遮遏其疏使不得

上後乃知威使至上海力請用兵爲英廷所斥展轉

屬之節相李公至煙臺會議使如嵩燾之請以 朝

命徑赴上海就商辦理則其勢更順而轉旋之機更

捷劉錫鴻百計營求充當隨員是時京師議論橫決
樞府勿能辨也恐此疏上多觸樞府忌諱卽渠隨同
出洋亦覺減色用其自私自利之心一以强悍行之
小人之無忌憚亦復何所不至乃使區區任事之心
爲所阻遏無能自明深悔爲其所賣至上海復補陳
之則事機已去言之不足動聽矣 自記

奏疏卷十二

請禁鴉片煙第一疏

奏爲鴉片煙爲害中國英國士紳設立公會勸止販運
急應由中國設法辦理恭摺仰祈

聖鑒事竊查西洋通市廣東已越千年從無侵擾道光
二十年議禁鴉片煙遂至失和展轉相尋以有今日推
原禍端創鉅痛深宜如何疾首蹙額相爲戒禁以示無
忘國恥之義而就臣耳目所及言之自道光時定立鴉
片煙罪名設法嚴禁官吏奉行不能如法但藉以爲差
役訛詐之資始終未懲辦一人所定罪名亦苦太重相
與玩視咸豐九年議開鴉片煙之禁而於在官人員及

奏疏卷十二

三

應試士子及營兵仍不準其吸食則但視爲具文無知
有禁令者因查鴉片煙之禁始自雍正時其初但充藥
品販運內地所特政教脩明官吏稱職民間凜凜畏法
無敢吸食至道光初而其風始熾浸尋由印度傳至雲
南而南土興矣展轉傳至四川而有川土又傳至甘肅
而有西土由是而至貴州由是而至陝西山西一二十
年來廢田而種鴛粟歲益浸廣而西洋販運中國亦歲
益增多足見開種日繁卽吸食者日眾勢將盡中國之
人皆自失其生理槁項黃馘奄奄僅存無異殘廢西洋
人士知鴉片煙爲害之烈與中國受害之深也相與設

爲公會廣勸禁止栽種販買臣至倫敦其地世爵夏弗思伯里及議政院馬克斯求爾德及教士里格得爾刺爾丹拏畢士等五十餘人相就論此義形於色其議政院阿什伯里徧游各國所至風土人情照相記之而於中國爲男女僵臥吸食鴉片煙以取笑樂臣甚愧之竊以爲禁止鴉片煙不在繁爲禁令在先養士大夫之廉恥而其要尤在長官稽查督察使不能有所寬假宜先示限三年責成督撫分飭州縣多製戒煙方藥施散勸諭以滿三年爲期逾期不能戒者官吏參革生監舉人褫斥長官不舉發同罪而凡文武應試士子例具五童互結宜以鴉片煙爲首禁容隱者一併除名童生吸食鴉片煙皆先停考濫入場者廩保坐黜廩生吸食鴉片煙皆先停止保人濫保者教官亦坐黜至於三年期滿學校中不準復有吸食鴉片煙者用以激厲士民之心而作其氣亦在使知所恥而已其川滇甘陝各省栽種鴉粟則必以課吏爲先臣聞種鴉粟一畝所出視農田數倍工力又復減省州縣因之添設陋規私收鴉片土稅亦數倍於常賦官民皆有所利以致四處蔓延積久而種鴉粟者男婦相率吸食不能如印度所出煙土嚴禁其民吸食也因以積成癖情之性飲食費用虛耗日

多遂使田賦常供亦多不能輸納卒致官民交困而奪民食之需以空倉廩之藏廣種鴛粟流毒無窮豈復能有自存之理因查雍正年間

諭飭廣東禁止栽種甘蔗諄諄以民食爲憂甘蔗製造糖食日用所需

聖心猶隱慮之何況鴉片煙爲貽害國家之具其產出印度距東洋爲近而日本特設厲禁無吸食者獨中國販運銷行每年課稅至數千萬爲英國入款一大宗而其地士紳會議猶勤勤焉謂煙土貽毒中國引以爲咎倡言禁止中國人民肆行吸食略無悔悟其勢非嚴督撫處分以督率州縣不能望有轉旋伏乞

奏疏卷十二

五

皇上堅以持之寬以期之以三年之期責成各省學政整頓學校責成各省督撫整頓屬官而於栽種鴛粟又須由督撫責成州縣勸諭紳民整頓所屬地方漸摩勸化更需以二十年之期盡民人而變革之求實效而不爲虛語務力行而不責近功其道無他惟在疏通民氣而已矣竊見西洋各國官民一心急使遠戍而不以爲苦煩征厚斂而不以爲苛所以然者爲無不通之情故也中國民情常苦隔閡利病好惡之私州縣能體及者鮮矣累積而至督撫則益曠遠不相及自古言善政者

必以勤卹民隱爲先仰窺

列聖之成謨嚴以察吏寬以馭民於民情尤加曲體雍
正時民間疾痛疴癢曲折畢達莫能壅隔是以其時無
不除之弊無不行之政臣以爲禁止鴉片煙當使教化
轉移之意多防禁操切之術少使天下臣民諭知此意
自有不敢不禁不忍不禁者存乎

皇上一心之運用中外人心無不響從臣於正月內接
據粵紳唐德峻等稟呈咨請總理衙門轉奏其後屢見
英國士紳力陳鴉片煙之害發於至誠又復會集多人
陳述此義又接粵紳桂文燦溫清溪等二稟人心向善

奏疏卷十二

六

之機想亦

列聖在天之靈所默鑒是以不敢不據實縷陳竝就微臣
知識所及略陳辦法以期實有裨益無任悚息屏營之
至伏乞

皇太后

皇上聖鑒訓示謹

奏

請禁鴉片煙第二疏

奏爲禁止鴉片煙應行事宜前摺多未及詳謹補陳數條上備

聖明採擇恭摺仰祈

聖鑒事竊臣光緒三年二月初八日具奏設法嚴禁鴉

片煙一摺至今未奉

批諭竊惟國家興利除弊關係重大未易輕議整頓鴉片煙爲害中國五六十年通計各省士民陷溺其中率十之四五其害日廣其毒亦日深道光十九年

特詔嚴禁遂至激成海疆之禍而吸煙者愈多至咸豐

奏疏卷十二

七

九年例禁已開更無顧忌臣於此時復爲禁止鴉片煙

之議人皆知其難行而臣揆之事理驗之人心願獨以

爲至易蓋使

國家嚴立科條責成地方官禁之徒以擾累百姓其終必至愈禁而愈開使人民自爲禁制以獎勵其廉恥而激發其天良則動於

詔旨一二言而人心自振積弊亦將自除此臣熟籌深

計而決知其必然者也謹就愚見所及略具數條敬爲

皇上陳之

一曰權衡人情以定限制之期臣前摺議禁鴉片煙以

清理學校爲先所有文武職官及舉貢士紳一例示限三年自屬一定不移之章程而其中情節實各不同有因治病吸食者有年逾五十精力已衰不能驟戒者惟當責成各地方清釐整飭萬不可揆剔窺伺反開揭告之風其紳民五十以上已至垂暮之年亦可無庸示禁蓋此次議禁之意在嚴絕其將來不在追咎其既往庶幾人心不至驚惶卽督撫大吏因病吸食亦可無憂反噬

朝廷但有察覺無難處辦至於學校出身之階正本清源端在於是自府縣試互結卽須以鴉片煙爲首禁應纂入學政全書萬不宜絲毫寬假此權衡人情之大端也

奏疏卷十二

六

二曰嚴禁栽種以除蔓延之害臣前摺敘述甘陝雲貴山西四川等省栽種鴉粟情形沿西數千里之地日肆蔓延而江蘇之徐州浙江之台州亦皆種植鴉粟有徐土台土之名而一皆消行內地是各省多栽一畝卽民閒多增一畝之害端

國家亦多廢一畝之生產

臣

在京師聞山西撫

臣

鮑源

深請禁栽種鴉粟出省閱兵各州縣先期拔去驛路兩旁鴉粟一二畝改種禾麥相傳爲笑近年吏治廢弛日

甚欺誣粉飾莫知爲非非得督撫臣深體

朝廷之用心切實推求斷絕根株萬不能有裨益此嚴

禁栽種之大端也

三曰嚴防詭詐以除胥吏之擾

朝廷明示例禁督撫下其令於州縣州縣卽授其權於書差乘勢苛擾得賄包庇其害且有不勝言者又自咸豐時明開鴉片煙之禁旋禁旋開又旋加禁亦復無此政體臣之愚見以爲當時開禁僅及民商官紳仍照舊禁止是今日之議禁與咸豐時之開禁用意正屬相同而一以勸戒爲義則差役之騷擾不能不先爲嚴禁但

奏疏卷十二

九

有因事生風借禁煙爲名稍事訛詐應聽民人呈控交涉書差者立行拏懲交涉地方官者亦立與嚴參總期使民間實受禁煙之利而不至虛貽禁煙之害此嚴防胥吏之大端也

四曰選派紳員以重稽查之責近年廣東設立勸禁鴉片煙會臣常嘉其用心之善然出自民間私議有勸導之功而無董率之責其勢不足以振發人心應飭各省督撫臣舉派在籍公正知事體紳員一二人使專司示禁鴉片煙之責以次責成各府州縣及學官各舉派總辦一人幫辦二三人仍由府紳總其成以達於省紳而

稽考其成效亦不必設立公局開支經費但由地方官及各紳民捐資廣製戒煙方藥分散四鄉責成各族族長稽查一族各鄉鄉長稽查一鄉督撫卽因以推知州縣之奉行與否及各府縣紳員之得力與否一除粉飾之心而坦然示以大公惻然推以至誠紳民未有不感動踊躍自爲禁制者此舉派稽查之大端也

五曰明定章程以示勸懲之義竊查鴉片煙之盛行在道光中葉以後風俗人心因之日趨於澆薄水旱盜賊相承以起貽患至今是鴉片煙之爲害不獨耗竭財力戕賊民命實爲國家治亂之機一大關鍵是以道光中

奏疏卷十二

三

設爲厲禁嚴刑原屬懲姦之要義立法竝無稍過惟當綱紀廢弛風俗頹敗之餘法令愈嚴推行愈多梗塞不能不以整齊之令寓諸從容勸導之中而人心軌法已甚其驟難禁革之積弊尤應明定章程以使知利病之切身而自求變計其法卽取販賣鴉片煙之例以爲禁煙之資凡運販鴉片煙土者無論城市鎮樞準釐稅加徵五倍永不特免亦責成紳員互相稽查一由釐局徵收而酌提爲製造方藥之費其各省栽種罌粟者亦皆示限嚴禁各視土地所宜責令改種五穀其田土有多寡又有承佃及自耕之分逾期不改種二十畝以上

酌提一半充公承佃者出自業戶之意全數充公出自佃民之意責成更佃不遵辦者亦全數充公二十畝以下勒限懲責其充公之田各就其鄉添設小學及善舉由地方官督飭辦理有侵食者亦聽呈控懲辦此明定章程之大端也

六曰禁革煙館以絕傳染之害鴉片煙爲害之烈尤莫甚於煙館無藝平民及子弟之有管束者無不從煙館吸食以至積而成癮其害亦人所共知而不能禁革者在官之耳目不能敵書差之包庇也聞兩江督臣沈葆楨嚴禁煙館皆相率移至城外以沈葆楨切實認真其

奏疏卷十二

三

力亦不過周及城內而已非責成各處士紳自相稽查萬不能有實際而非督撫及地方官有實求整飭之心亦萬不能責士紳之奉行是以自古興利除弊尤以察吏爲先在京各城司坊等官在外各州縣巡檢典史能不以收受陋規爲事禁革煙館卽亦非難此嚴禁傳染之大端也伏查

國家興利除弊大抵交涉部務應由部臣制其準駁之權其有違犯禁令亦應由部臣添議科條編入則例惟此次禁止鴉片煙先及官紳士子本屬從前未開之禁無庸另立專條其禁止栽種鴉粟及開設煙館尤屢見

之奏案明示例禁至於州縣差役之訛詐按律處辦已自有餘竝無庸酌增條例各海口徵收洋土稅則照舊辦理或另立章程稅釐竝徵酌量增加均可及時開辦聽從販運與此次議禁大旨全無妨礙竝奉有禁辦明文臣卽照會英國外部漸次禁止栽種販運此時開辦之始惟當從容涵泳寬以二十年之期先官而後民先士子而後及於百姓一以漸摩勸戒爲義明示以

朝廷愛養民力援拯陷溺之苦心力除苛擾與天下相感以誠其大要尤在責成各省士紳自立章程切實勸導求實效而不務虛文求真有益百姓而不專假官勢

奏疏卷十二

三

以責近功人心具有天良無不可感動禁革者伏乞天恩明下臣章飭各督撫臣虛心核議實力舉行天下臣民蒙被

聖恩永無涯際誠不勝區區感激所有補議禁止鴉片煙條款緣由謹繕摺具陳伏乞

皇太后

皇上聖鑒訓示謹

奏

論俄事疏

直隸總督肅毅伯李代進

奏爲遵

旨直陳所見恭摺仰祈

聖鑒事竊

臣

恭讀光緒五年十二月初四日

上諭此次會議事件中外交工及在籍大臣如有所見均可據實直陳等因欽此仰見我

皇上慎重邊防周諮博訪之至意因查前左都御史

臣

崇厚在俄定立條約十八款不察山川扼要之形勝不明中外交接之事宜種種貽誤無可追悔然西洋各國遣派使臣相與議定條約原應由各國覈准施行是此

奏疏卷十二

三

案非駁之權仍制自

朝廷所有遣派駐紮各國使臣但係兩國交涉事件應責成料理總理衙門但一諭飭駐俄公使轉達俄國外部伊犁條約暫難覈准權聽俄兵駐紮伊犁以俟續議俄人雖甚猖獗亦不能違越萬國公法以求狂逞祇此權應之一法可以稍戢俄人之志卽在我亦稍有以自處

臣

請通前後情事爲我

皇上分別陳之

一曰收還伊犁應由甘督核議乾隆年間戡定準回各部設立各城駐紮兵弁外設屯卡與各屬部畫分疆界

百餘年來哈薩克布魯特諸部日以衰微其地多爲俄人侵占又西域浩罕諸部與西域壤地緊相毗連而自回疆畔亂二十餘年屯卡燬棄殆盡卽令俄人繳還伊犁一城清理疆界極費推求陝甘督臣左宗棠平曰講求地理之學經營西域已逾十年形勝險要爲能詳知萬非數萬里外遣一使臣憑空定議之事臣所謂收還伊犁應由甘督核議者此也

二曰遣使議還伊犁當徑赴伊犁會辦俄人占踞伊犁時但以保護疆界民商爲言原約中國平定西域仍行退還是收還伊犁竝無他慮惟慮俄人索取兵費太多

奏疏卷十二

三

此須至伊犁相度情形乃可置議左宗棠以戰功平定西域不肯居贖回伊犁之名揀派大員會議著緊亦專在此無捨伊犁而徑赴俄會議之理卽令議辦已有端緒應遣使赴俄定約亦必須由肅州取道伊犁兼與左宗棠商定一切臣在倫敦日本遣使恩倭摩的赴俄議換庫頁一島卽所謂蝦夷島也在該島爭持多年乃遣使赴俄計議其使臣卽由庫頁島徑赴黑龍江取道伊犁繞烏拉嶺赴俄爲其水陸交通險隘形勝及其兵力所注非身親考覽無由知也俄酋高福滿駐紮伊犁兼統浩罕諸部其與崇厚議還伊犁二萬里調高福滿回

國會辦此在中國關係絕大而在俄人則進退皆利無
關得失之數而其任勞覈實如此臣所謂遣使議還伊
犁當徑赴伊犁會辦者此也

三曰直截議駁伊犁條約當暫聽從駐紮其勢萬不能
急速收還臣查天山南北兩路所以號稱肥饒者正以
河道縱橫灌輸之故俄人所踞西伯利部一萬餘里竝
屬荒寒之地近年侵奪塔什干浩罕諸部曲意經營前
歲見俄國新報言其提督斯哲威爾探尋巴米爾朗格
拉湖一帶報稱喀拉庫拉湖至阿克蘇有通長不絕河
源深入俄國荒漠之地爲歷年人跡所未到舉國相爲

奏疏卷十二

五

慶幸其睨視西域蓄謀已深伊犁一城尤爲饒沃自伊
犁河以南曰哈爾海圖產銅曰沙拉搏和齊產鉛其北
山曰空鄂爾崑博產煤曰關里箐產金曰索果產鐵往
時河南設有銅廠鉛廠竝近距特克斯河而辦理不甚
如法山北煤鐵各廠則尙未開採西洋人羣視爲上腴
之地伊犁所屬九城專駐兵弁其膏腴竝在河南山北
西至霍果斯亦設有一城距伊犁不逾百里所設額爾
格齊罕諸卡皆在五百里以外今畫分霍爾果斯河屬
之俄人則伊犁一河亦截去四之三而五百里之屯卡
皆棄置之矣畫分特克斯河屬之俄人則舊設銅鉛各

廠亦與俄人共之而特克斯河橫互天山以北其南直
接庫車拜城聲氣皆致阻隔所設屯卡直達特克斯河
源皆棄置之矣塔爾巴哈台距伊犁東北尚在千里以
外聞亦有畫歸俄人之地以一城孤懸浮寄盡割置其
膏腴之地名爲收還伊犁而實棄之此時置議較之從
前其難萬倍當據萬國公法由

國家徑行議駁無可再行商辦之理以此時蠲棄伊犁
與收還伊犁其勢竝處於兩窮惟有申明權聽駐紮以
杜其狡逞之心而仍以從緩計議稍畱爲後圖庶自處
於有餘之地而亦有餘地以處俄人臣所謂直截議駁

伊犁條約暫聽俄人駐紮者此也

奏疏卷十二

三

四曰駐紮英法兩國公使不宜遣使俄國西洋各國互
相聯絡各視其國勢緩急輕重與其恩怨以爲之程數
百年來攻伐兼并事變百出而目前大勢則英法兩國
爲私交俄德兩國爲私交德與法仇憾方深英與俄尤
爲累世積怨其心意所向背卽其喜怒好惡亦皆隨之
轉移臣嘗論英法共一公使俄德亦當共一公使凡爲
公使駐紮非但以虛名通兩國之好而已實有維持國
體之責與商辦事件之權遣使會議當在伊犁而其難
通之情與其兩不相下之勢由駐俄公使達之俄國朝

廷以持其平而分其責此亦萬國公法所當準情據理通論其節要者似此加派使臣改議已定條約恐徒資俄人口實以肆行其挾制之術俄國新報已言伊犁條約由英人播弄翻悔亦可窺見其用心矣臣所謂駐紮英法兩國公使不宜遣使俄國者此也

五曰定議崇厚罪名於例本無專條亦當稍準萬國公法行之臣查崇厚貽誤

國家原情定罪無可寬假然推其致誤之由一在不明地勢之險要如霍爾果斯河近距伊犁特克斯河截分南北兩路均詳在圖志平時略無考覽俄人口講指畫

奏疏卷十二

三

乃直資其玩弄一在不辨事理之輕重其心意所注專在伊犁一城則視其種種要求皆若無甚關繫而惟懼繳還伊犁之稍有變更一在心懾俄人之強而喪其所守臣奉使出洋以崇厚曾使巴黎就詢西洋各國情形但言其船礮之精兵力之厚以爲可畏崇厚名爲知洋務徒知其可畏而已是知其勢而不知其理於處辦洋務終無所得於其心也一在力持敷衍之計而忘其貽害臣在巴黎與崇厚相見詢以使俄機宜僅言伊犁重地豈能不收回頗心怪其視事之易而亦見其但以收回伊犁爲名於國事之利病洋情之變易皆在所不計

故常以謂與西洋交接亦當稍求通悉古今事宜中外情勢而後可以應變是以崇厚之罪人能知之而能言之而當定議條約之時崇厚不能知也攜帶參贊隨員亦皆不能知也置身數萬里之遙一切情勢略無知曉有聽俄人之恫喝欺誣拱手承諾而已

朝廷以議駁條約加罪使臣是於定約之國明示決絕而益資俄人口實使之反有辭以行其要挾崇厚殷實有餘宜責令報捐充餉贖罪而無急加刑以激俄人之怒卽各國公論亦且援之以助成俄人之勢臣所謂定議崇厚罪名當稍準萬國公法行之者此也

奏疏卷十二

三

六曰廷臣主戰祇是一隅之見萬宜斟酌理勢之平求所以自處而無急言用兵臣查西洋構患以來凡三次用兵廣東因禁煙甯波天津因換約皆由疆臣處置失宜以致貽患日深積久而益窮於爲計然其時中外之勢本甚懸絕一切底蘊兩不相知徒激於廷臣之議論憤然求一戰之效至今日而信使交通準情理處自有餘裕俄人之狡焉思逞又萬非比英法各國專以通商爲事釁端一開構難將至無窮

國家用兵三十年財殫民窮情見勢誦較道光咸豐時氣象又當遠遜俄人蠶食回部拓土開疆環中國萬餘

里水陸均須設防實力實有所不及即使俄人侵擾邊界猶當據理折之不足與交兵角勝何況以伊犁一城遣使與之定議準駁應由

朝廷縱彼以兵力要挾亦可準度事勢之宜從容辨證何爲貿然耀兵力以構釁端取快廷臣之議論臣所謂廷臣主戰祇是一隅之見者此也竊以爲

國家辦理洋務當以了事爲義不當以生釁構兵爲名名之所趨積重難返雖稍知其情狀亦爲一時氣燄所懾而不敢有異同臣之愚昧直以爲今日之急務固不在此應懇

奏疏卷十二

完

天恩飭令駐俄使臣轉達俄國外部以伊犁一城爲天山南北兩路關鍵中國必待收還而此次崇厚所定條約萬難覈准所有俄兵駐紮伊犁應暫無庸撤退從前喀什噶爾曾經與俄通商應否照舊舉行之處由陝甘督臣左宗棠與俄國督兵大臣會商覈辦以期妥善無得輕易率請用兵致失兩國交誼開誠布公正辭明辨責成督臣妥爲經理或冀幸挽回萬一以後與俄人交涉亦可於此稍得其端倪關繫大局實非淺鮮臣以庸愚奉使無狀眾口交謫無地自容積年以來心氣稍耗疾病日增里居踰歲足迹未嘗一出門戶自分衰病餘

生無復犬馬圖效之望而軫念時艱重以崇厚之昏庸
貽誤多端幾至無可補救臣於洋務粗有所見誠知一
時公論於此必多觸悟然求之事理微之史策準之
國家之利病驗之各國之從違允宜及早斷行以免多
生枝節爲時愈久議論愈煩則益難於處理是以不敢
避詬譏而終甘緘默謹略獻其愚忱上備

聖明採擇所有遵

旨直陳所見緣由理合繕摺具陳伏乞

皇太后

皇上聖鑒謹

奏

奏疏卷十二

三

論法事疏

兩江總督裕靖侯左代進

奏爲法蘭西滋事安南宜求其癥結所在循理處置不宜遽構兵端恭摺仰祈

聖鑒事竊

臣

光緒二年在總理衙門見法人特拉格來

遊歷暹羅南掌緬甸以達雲南四川記載詳明由福建

撫

臣 繙譯咨送

臣 但見其遊歷南掌一冊內言南掌通

中國有三路一循湄江而上出緬甸通雲南一出湄江

右支囊呼河通雲南一出安南東京兩界間通廣西知

其心伎英人通商騰越蓄意與爭勝雲南地產之厚尤

西人所豔稱也是以考求通雲南之路尤急其後日本

奏疏卷十二

三

毀滅琉球法人因乘勢與安南構釁以爲開通富良江之計蓋西人以通商爲利尤善蹈瑕抵罅據爲程式與安南議論相持兩年而其經營發難實在乙亥丙子之交其指定蒙自口岸尤擅雲南之勝以其地饒沃平衍水陸交通北距雲南省城西距普洱道里適均實遠出騰越之上其用意愈深其求成之心必愈堅

臣

以爲宜

由

朝廷權衡利病輕重應否准與通商定計於事先設官置防使足以資控御庶不至如沿海情形令西人操通商之權屈中國以從之其或定計不與通商亦當熟籌

因應之宜深究理勢之歸有所據以制其勝期收折衝
尊俎之功西洋各國因事辨爭有相持數年而始定者
卽不得已而用兵亦反復籌商遲久始決從未聞貿然
發議稱兵一相嘗試就安南事勢言之當有救援彈壓
之師不當有防堵之師明非利害所繫故也若論雲南
通商事勢所爭尤在議論決不在於用兵臣因考自古
經國之計專務招徠商賈無以閉關絕市爲義者漢書
西域傳稱屬實惟利賈市安息臨媯水商賈車船行旁
國康居欲買市爲利大宛善賈市爭分銖必市乃得所
欲班史不載邊關市易而於四國發其例是以後漢書

奏疏卷十二

三

言武帝開通西域商胡販客日款於塞下唐書開元盛
時東至高麗南至眞臘西至波斯吐番堅昆北至突厥
契丹靺鞨謂之八蕃稅西域商胡以供四鎮當時通商
之利益可想見明史謂唐宋以來行以茶易馬法用制
羌戎是以宋世熙河秦洮皆設茶務不以寇掠攻守廢
市易明設三市舶司甯波通日本泉州通琉球廣州通
西洋諸國交趾雲南皆設市舶提舉司始終未聞以市
易滋亂其後罷甯波市舶日本海賈往來自如轉相寇
亂海上遂無甯日見之明史食貨志可以推知其利病

至於

國朝控制夷狄之大法尤爲曠越前代康熙初與俄羅
斯議定疆界聽其貿易不禁俄商絡繹往來京師至三
十二年定爲三年一來京貿易而庫倫仍聽互市雍正
五年設沿邊卡倫始移市務卡倫外之恰克圖距庫倫
且至千里而罷京師貿易相沿至今其後節次割分邊
界由額爾古納河東至混同江橫約二千餘里由烏蘇
里河南至圖們江縱約千餘里由恰克圖西至烏梁海
繞出蔥嶺縱橫各數千里猶恃恰克圖通商界限由額
爾古納河東徑黑龍江以達松花江西盡唐努山以南
界畫井然不虞侵佔誠令塔爾巴以北伊犁以西當時

奏疏卷十二

三

設有通商市務必能相與保全以資守衛臣歷考古今
事勢益信明史言馭邊之要以互市通夷情使法禁有
所施省戍守費誠爲有利無弊而如恰克圖展至庫倫
千里以外尤其效之彰明較著者也今沿海通商十三
口長江以上通商五口雲南通商一口俄羅斯出入西
北各口並通行無阻區區蒙自一口無關中國要害通
籌始終總覽全局必有能辨知其得失者至於用兵之
費籌餉之煩與其買焉而起買焉而止及不幸而出於
戰賠繳兵費之累中外諸臣皆能深知徒以眩於南宋
以後之議論不務考求古今事局以上窺

列祖經營撫綏之大略明通公溥坦然以誠相示而用其一隅之見附和清議苟求見恕於人言以是辦理洋務四十餘年始終不得要領而坐受人言之挾制方今時事艱難民窮財殫國計吏治人心風俗本源之地所憂實多汲汲補救猶懼不給無故自生釁端屢滋煩費誠謂非宜臣老病餘生氣息奄然無所顧忌又嘗蒙被聖恩備員總署稍能周知中外情形以理自信實見法人通商蒙自宜以時迎機理喻使受約束不宜率爾稱兵終至無以善其後而滋累無窮用敢披瀝愚忱冒昧上陳冀荷

奏疏卷十二

三

聖慈垂察不勝戰慄隕越之至伏乞

皇太后

皇上聖鑒謹

奏

請正朝鮮亂民之罪片

再臣傳聞朝鮮國都有圍攻日本公使一案其始由近年通商日本漸及西洋各國考求西法於是其國人民分黨爭勝曰守舊黨曰開化黨各据所見以相詰難而人情狃於所習見而震於所創聞守舊一黨相附和者其人數必多而益囂因圍擊日本公使遂至侵犯王宮肆行叛逆此實近今未有之奇變竊度日本旦夕必加兵朝鮮或具朝鮮情狀告知

朝廷亦頗難爲酬答或竟不告知則朝鮮之國危而中國之體亦全失臣愚以爲宜下

奏疏卷十二

五

明詔正朝鮮亂民之罪興師討之移檄日本以朝鮮亂民爲逆陵辱日使非徒日廷之私憤實亦中朝屬國之巨憝允宜興師問罪誅討亂民選立故王之後以懲暴安亂爲義而無利其土地日廷命將出師亦同此義直當同心勦力以定朝鮮之亂調集天津水陸之師四五千由海道進討使日本猶有顧忌以不至狡逞卽中國亦有以自處兵者聖王所以誅暴亂禁姦宄是以滇粵各邊無可用兵之機而朝鮮在今日實有迫以不能不用兵之勢良以日本蓄謀已深亂民乃無故激成其變察其情勢已成於不可遏爲國家大局計誠有不能坐

視者此亦先發制人之術也至論朝鮮人民之樹黨其罪皆無可追臣子之義利病榮辱無可爲身計者期於利國而已誠見其有利於國毅然爲之可也一事之微而有先知先覺之責君子固當任之不知其利而相與憤爭亦無害其爲正論然而國勢之羸絀事機之緩急要當有審幾之智其閒立國有本原推行有次第所以通古今之變而察本末之序尤不可終安於不知有官守者任其事事所不屬無不可明其理分黨爭勝明樹之使亂民有所藉口而遂戕及國家竊以爲朝鮮人民之罪無論何黨皆應一申

奏疏卷十二

三

天討王者之治亂以急正風俗爲先周書羣飲之誅爲風俗人心之可無恕也朝鮮所謂大院君者一日不伏誅無以定一日之人心此尤我

國家無可推延之理誠宜斷自

宸衷剴切宣示以振厲中外人心而求所以奠安朝鮮鎮服日本所保全實大臣不勝瞻望感激謹據所見上

陳伏候

聖明採擇謹

奏

因法事條陳時政疏

繕呈直隸總督肅毅伯李
兩江總督恪靖侯左代進

奏爲西洋構患已深宜急與理處不宜與交兵謹推陳
本末始終之數以明得失之機恭摺仰祈

聖鑒事竊查西洋之通中國肇始西漢海道通商則原
於隋唐之交歷今千數百年至道光年間鴉片煙行於
中國始有禁煙之議辦理參差激成釁端嗣是而有定
海甯波之變又有鎮江之變又有廣東省城之變又有
天津之變再四交兵或極一時之兵力靡費餉需累巨
萬終至增加通商口岸索賠兵費前後五十年中反復
相尋如出一轍蓋西洋以通商爲義自始開國至今千

奏疏卷十二

三

八百餘年兵力愈練愈強製造愈習愈精通商口岸亦
愈推愈廣外蕃各國盛衰強弱或數十年數百年一變
惟西洋一主通商歷久不變其佔踞地方遠至數萬里
皆以通商爲名初無窮兵之心而數反數覆必因釁以
逞兵亦並無爭地之心而屢戰屢進卽乘勢以掠地南
洋各島侵佔殆遍無不由此是以交涉西洋通商事宜
可以理屈萬不可以力爭可以誠信相孚萬不可以虛
僞相飾可以借其力以圖自強萬不可恃其強以求一
逞臣嘗論西洋要求事件輕重大小變幻百端一據理
折衷無不可了一戰則必不易了以彼所求者通商耳

其蓄謀或在數十年之前其作勢嘗自處萬全之地每至張大其辭以相要挾而其與中國相去數萬里用兵之費又數倍於中國本不能輕易言戰其志又不過通商爲利非有仇憾積於其心察其不輕言戰詰難往復固有餘地以自處而求各得其利因其不輕言戰而激使狂逞則爲害必多一經交兵所用兵費終謀取償此亦西洋各國互相鉗制之義直無辭以拒之或竟受懲創揚帆以去各省海口不能撤防一年二年又必復至或遂恣意橫行爲禍且將愈烈西洋各國交兵或十年二十年每戰礮火交轟亦至數日不息近年如普法戰

奏疏卷十二

三

蹟記載甚詳中國沿海八九千里果何以堪之此

臣所

以謂西洋各國環集中國無可戰之機無可戰之勢直亦無可戰之理法夷屢與越南私立條約專爲通商雲南起見自英人通商騰越尤懷爭先恐後之心見之特拉格爾深地記其蓄意早深據萬國公法駐紮各國公使專務保護人民料理通好事宜遇有爭辯大端必另遣使與議以所爭辯有允不允不允卽應辭歸公使不能辭歸故並不使與議勉強與議彼亦決不相信法夷構釁越南應遣使法都並應遣使西貢察機觀變而未

能遣使其滋擾越南一發端西貢而西貢地方中國人

民三十餘萬應設領事經理而未能早設此等緊要機
宜皆已坐失法夷初意西貢駐兵五百人橫行越南有
餘經劉永福橫出截擊彼亦驚出意外進退兩難可以
乘勢定議而又失此機會中外諸臣本無諳知洋務者
惟仰窺

朝廷意旨憤起言戰疆臣主兵又狃於軍營報仗虛張
聲勢之故習一以虛僞出之諱敗言功從無一語徵實
臣不敢申言勝負得失之故但就今日用兵利害言之
法夷滋擾越南未及中國也廷臣倡言主戰拒之於桑
臺拒之於北甯彼至則我兵先退彼退又以克復報聞

奏疏卷十二

完

法夷斂兵退守不進攻保勝而至天津議講是其意本
不求戰也自諒山一加掩擊而禍遂成嗣是而攻雞籠
傷亡數百人又攻馬尾傷亡數千人又轉攻雞籠傷亡
亦數百人迫使戕賊人民其害一馬尾船廠建置機器
所費累數百萬每製造兵船一艘多或百數十萬少亦
數十萬一戰而毀棄淨盡所耗至一二千萬徒自毀傷
其僅有之輪船與製造機器以供言者之一快其害二
西洋通商各口岸中國富商大賈輻輳其中轉輸營運
賴以不匱二三年來邊釁既開西洋各商收回成本停
止貿易沿海商賈傾毀無餘元氣大傷百姓相與轉徙

流離一口數驚莫保其生商賈受累尤甚是直自爲擾也其害三比年水旱饑饉公私庫藏皆至耗竭尋常無事各省入款多不敷出而觀今日徵調之煩召募之廣視咸豐年間討平寇亂用兵又更加多耀軍於無可施之地球戰於不相應之敵沿海數千里處處設防徒以自敝其力而無復有終極其害四漢臣魏相之言曰救亂誅暴謂之義兵敵加於己不得已而起謂之應兵爭憾小故不忍憤怒謂之忿兵恃國家之大矜人民之眾欲見威於敵謂之驕兵忿兵驕兵古人以爲大戒中外諸臣襲南宋以後議論反據之以爲名抑不知南宋諸

奏疏卷十二

罕

臣議論與其行事之得失載在史冊韓侂胄一用兵而宋以不振賈似道再用兵而宋燬矣以議論爭勝而不能推求古今之利病與人事之當否其弊遂至於此臣聞自古攘外必先安內西洋佔踞口岸深入腹地並無攘外之可言所急應講求者安內而已而使干戈四擾邊境驛騷攘外安內兩無所據應懇

皇上天恩明降諭旨令總理衙門大臣親詣英美俄三國使署會同理處平其曲直以息兵安民保全大局而爲今日根本大計關繫人心國脈尤有切要者四端敬

爲

皇太后

皇上陳之

一進退大臣太輕凡爲大臣皆積資累勞身負重寄平
口志行才略

朝廷考求有素淺深得失無不周知自非權姦能上蔽
朝廷耳目必待言官發其罪狀取快一時人心卽不當
以薄物細故指發隱微之過以至上傷國體下寒任事
者之心傳曰敬大臣孟子以責君堯舜爲敬其君則是
敬大臣者亦直責以伊周之事敬之愈至則責之愈深
若視其大臣日在猜嫌之中而使疏遠小臣揭發其陰

奏疏卷十二

聖

私指摘其小過以矜激直廟堂之上荆棘叢生大臣救
過不遑互相交結各顧其私爲害反甚晉臣王弼猶言
不疑於物物亦誠焉不私於物物亦公焉未有致疑於
人而能盡人之力者大臣稍有廉恥亦惟引身以避賢
路而已於國家果何利乎人才祇有此數大臣不可信
豈有小臣反可信之理徒相率爲絞訐希指邀榮以求
美仕其於人心風俗所關尤鉅

聖明之世豈宜有此

一聽言太雜自宋儒以崇獎言路爲義數百年來優待
言官奉爲故事臣愚以爲言官之職匡正朝廷過失誠

斥權姦凡爲權奸者必其能巧相結納以中人主之心者也終始以正君爲義故自唐宋以來皆名之曰諫官拾遺補闕使朝廷無過舉而後可以謂之忠直然自宋之盛時君子小人互相攻訐喧闐盈廷至於南宋爭和爭戰陳義愈正持論愈囂明之季世則將帥主兵進退機宜亦自言官操之兩朝以至大亂此非言官之害言官任意囂張不稱其職之害也粵匪經亂以來民困未蘇吏治未清紀綱法度日益廢弛承衰敝之俗行操切之政未有能善其後者三四年來言官毛舉細故見事生風大率因睚眦之小怨用影響疑似之傳聞臚列入

奏疏卷十二

望

告

朝廷遣使四出驛站之騷擾州縣之供給已不勝其憊而又內顧言官之意旨經營傳會以定爰書

朝廷用是以求通民隱而民隱愈蔽求申冤抑而冤抑愈深則亦言官無能讀書通知事理徒用苛察評告窺求影射以爲直也所苛求者一言一事之微而所關國家大局固已鉅矣其甚者疆吏之賢否藩臬之遷擢皆取決言官一疏斷行不疑太阿倒持尤乖政體迄於今日吏治日媮民生彫敝所在愁歎而言官所陳但舉虛文小節未嘗深念民生休戚與

朝廷措置之宜崇獎太過徒長虛誣實爲害政

一進用人才太驟虞書舜禹相戒之辭微矣而獨斷言之曰無稽之言勿聽弗詢之謀勿庸誠知言之不足取信也故曰國君進賢如不得已若因一言之有當

聖心遠資倚任加之顯擢羣懷希侍相率效尤倚託攘斥夷狄之美名人挾一疏急求榮進迨至事任已屬變故驟興遷就倉皇周章失措流俗無知摘其章疏告示傳以爲笑

朝廷培養人才文章志節皆所取資期使觀理日深練事日熟庶足備遺大投艱之選獎進一二虛浮之言以

奏疏卷十二

聖

助其恣睢而使人懷覬覦羣言淆亂實爲可惜恭親王精明仁恕小心敬畏於洋務尤所深諳遠出一時廷臣之上而不敢以己見理處一切付之公論洋人皆服其誠屢經事變卒能從容鎮定消弭禍端聞其罷退無不咨嗟歎息追論其賢足知言官連章論劾實不知有天下大計徒眩於諸臣進用之驟探求

朝廷意嚮欲因以立名也

臣伏見

文宗卽位之初盜賊縱橫東南塗炭而又事變迭乘天下岌岌

文宗惟一守之以定靜持之以堅忍羣臣奉職無有疑

難用能當大故而不惑平大亂而不搖值時事艱危之際尤當爲天下了事不當爲天下生事靜默簡約察吏安民期以培養國家元氣無使傷損議論多一分虛浮而國事日壞官吏多一分操切而民氣日傷政令紛更黜陟予奪易於反掌徒使賢者氣沮而狂惑喜事之人日益驕橫在於今日尤謂非宜

一用兵太失權衡竊觀漢唐名臣史傳所載疏論皆以諫止征討爲義從無敢有倡言用兵者南宋之世假復讎爲名而言始鬩嗣是八九百年相與以用兵主戰爲常談然南宋時議論雖囂而主戰者猶將帥也至明則將帥持重不敢戰而言官迫之使戰乃至封疆大吏亦承望言官風旨動爲主戰之說上希

朝廷嘉獎下邀流俗無知之稱譽老子之言曰佳兵者不祥之器不得已而用之漢文帝於南越寇邊猶遣使喻意以多殺士卒傷良將吏爲戒所以爲聖人之仁凡可以不用兵而言用兵者是樂殺也故曰人發殺機天地反復甚可懼也西洋立國專務通商其兵愈強而愈不輕言戰卽此次通商雲南始終以計畫經營先與越南定立議約屢經改訂事端顯見與未通商以前西洋事勢一無見聞情形迥異無難據理辨爭折服其心卽

以通商論沿海以達長江開立口岸十四五處又遠及
瓊州臺灣雲南之騰越亦已與英人通商何惜蒙自一
口雲南貨物與越南交易西及暹羅南掌老撾諸國從
未設立稅關劉永福佔住保勝收其稅利卽中國出入
各國之通津也多開蒙自一口卽多收一口之稅實爲
有利於國無損於民從漢至今二千餘年凡與四夷外
蕃互市之地從未滋生事端正以利源所在彼此均懷
顧惜以是能久遠相保也彼所議者商務廷臣所爭者
用兵臣實不解所謂道光盛時關天培楊芳皆百戰名
將不足以資一戰至咸豐時科爾沁親王僧格林沁及

奏疏卷十二

聖

樂善史椿榮尤爲宿將知兵亦不足守一口以彼兵力
之強亦實不願開釁中國何爲激之使逞聞兵以義動
未聞挾憤以求僥倖一勝者也國家辦理洋務必求通
知洋務之人北洋大臣李鴻章南洋大臣曾國荃並能
曉暢戎機周知各國情事

朝廷責以了處洋務指揮奠定有餘必督之使戰而使
浮薄少年高談闊論陵歷其上欲恃語言縱橫爲制伏
外夷之略以

宣宗

文宗兩朝聖人艱苦經營躊躇審顧不欲輕試者諸臣

乃毅然任之不疑不顧事機之順逆不計餉源之盈絀則亦虛憍之議論積成習尙貽累天下國家之尤者也以上四條臣因目前洋務急須料理收束因推論洋務之原始實由廷臣議論繁多眩惑

聖聰以爲有可倚信而其實陳奏之辭多而辦事之心少主戰之文勝而用兵之術疏萬口紛囂昌言於公廷挈眷遠徙倉皇於私室外間一切情形從無有敢上達者風會所趨莫知爲非臣竊以爲與西洋交兵百勝不足爲喜數敗亦不足爲憂其患終不過苛索兵費多佔口岸甚則侵據沿海地方不必遽爲害內地而至用兵

奏疏卷十二

吳

日久中國力先不支所憂方大臣又竊觀天下大勢可憂者二一曰水旱饑饉近年山西大旱各省勸捐助賑相沿爲例直隸山東水災亦倣照辦理臣出使英國英人振助山西亦集資至二十餘萬一省有災四處環起相援則無慮水旱之頻仍也一曰寇亂自長江創立水師淮軍雷屯又二萬人緩急有可倚恃經亂以來各省亦皆有防軍以備不虞則無慮盜賊之竊發也方今所患獨有洋務西洋兵力之強製造之精從古未有而各國環列互相鉗制又其志專在通商卽有需索皆可據理駁詰故嘗以謂今日洋務戰守和三者皆無可言惟

在隨事應付而已應付得其宜可保數百年無事一失其宜卽無事轉爲有事小事釀爲大事得其宜則製造與練兵可用洋人之力而洋人之心亦服語言旣省國體亦尊一失其宜徒以長洋人之氣而所處日窮五十年來每一用兵卽國家多損一分元氣前事可爲殷鑒日前大勢但無海疆之釁水旱寇亂皆無足虞一經構釁而此二者相緣以起直無以爲善後之計所爭甚微所繫至鉅必欲用其衰敝之餘力求多於

兩朝聖人之功績

臣

未敢信謂然也

臣

衰且病旦夕不

能自保顧念時事艱難法夷佔據越南之西貢經歷多年植基已固邊釁旣開用兵直未有止境誠宜速與理處下顧民生爲萬世根本之計竊度中外諸臣知此義者旣少卽知之亦無敢上陳

臣

是以不敢自惜其餘生剴切陳之無任戰慄隕越之至伏乞

聖太后

皇上聖鑒謹

奏

嵩燾論洋務數犯天下之不韙侃侃言之一無顧忌非獨自信能通知洋情而已其自南宋以前上推至北宋又上推至漢唐又上推至三代源流本末利病

得失皆頗窺見一二下視明以來議論不顧國勢之
強弱不論事理之順逆襲取南宋諸君子之唾餘侈
口言戰自詡忠憤若蚊蚋之紛擾於吾前不足一與
校論惟見之明是以能言之無忌也此疏兼論當時
情事又自具有深意蓋若張幼樵陳伯潛諸人才望
清俊敦尚志節自亦一時人才在今尤不易得使之
諳習外事增長其識見以養成其才足備國家緩急
之用朝無明理之大臣見其侈口談論驚顧愕眙至
舉諸臣進退取決於其一言積爲虛誣浮薄之習又
用其虛憍之氣謂足資以禦外侮終至一毀無餘不

奏疏卷十二

哭

獨稱兵構釁貽禍天下卽亦非所以作成人才之義
諸所陳論但舉其大要而已時諸臣亦尙未議處故
亦不敢論及之自記

論河務疏

奏爲黃河南徙泛溢洪澤湖寢成入江之勢審量大局
謹擬分道疏濬以圖補救恭摺仰祈

聖鑒事竊查四瀆分自禹時河濟北流江淮南注水性
原各不同河與濟相出入江與淮相出入而必使分道
注海河性尤疾則又播爲九河使分流以殺其怒歷漢
而河合濟爲害始烈山東數百里之地潰決相仍歷宋
而河合淮爲害益劇河南江北數千里皆受其患大勢
逐漸南趨兼受諸水以助其湍悍之性漢平當言考經
義治水有決河深川無隄防壅塞之文宜博求能浚川

奏疏卷十二

完

疏河者然自漢數百年開穿渠行水徧於諸郡而於河
之爲害鉅者未聞有疏濬之功自是二千餘年惟以隄
防爲禦河之策隄日益高河日益橫獨元賈魯治白茅
決口絕汴河諸水引河行四百六十餘里出四里以復
舊河故道其因舊水故渠疏濬者十之八九別開一河
相接引十之一二謂之生地生地開深二丈許舊水故
渠加疏濬而已率不過數尺數月而竣工以是推之黃
河經行之處用人力疏濬者難爲功別開一河以引其
流反易爲力自道光之季河決銅瓦廂泛濫數百里入
大清河迄今四十年填淤日甚其勢不能强塞決口以

導使逆行舊河故道又皆淤塞水性就下不能不漫及淮潁往時河入淮則益導淮南行今又濶淮而入洪澤湖遂恐奪淮入海又更挾淮以入江江南財賦之邦所憂甚大竊意今日治河之法當考求賈魯河遺蹟引歸舊河故道開廣疏深使足有容銅瓦廂以東亦開一河引歸大清河使南北分流能全挽使順流入海可保數十年無河患卽稍分其勢以不至全力注淮亦爲今日救急之要義應懇

飭下南北洋大臣東豫兩撫及河督通籌全局審量地勢高下工役繁省或仍導使北行或乘其南趨之勢引歸舊河故道或應南北分疏當以何道爲正流何道爲支流然後分別地段刻期開濬委任責成先使河有所歸乃可言及堵築之功值

國家艱難物力凋敝尤應設法經營期使軍民通力合作以應一時之急而濟經費之窮宜飭兩江督臣調江南防兵萬餘人起清江浦以達雲梯關數百里督使開挖以二百餘人分任數里爲一段選派哨弁監工每一營官督理二三段仍其月餉量給辛食遣州縣以下一員司支放一洗河員積習使工役有數可稽清江浦以上至蘭儀舊河故道別開引河以達石橋決口令紳民

分承其役募被災難民按營制部勒分段開濬仍聽募捐助工因卽以工代賑自決口以北徑銅瓦廂以達壽張因漫河故道濬深開廣亦令紳民分段助工募被災難民以工代賑其大清河東北達牡礪觜飭山東撫

臣

調防兵萬餘人分段開濬大清河經流水源尙旺天津開河機器施行水中可以調取應用其開濬引河及新舊黃河則須人力與機器兼施宜博考西洋開河機器及疏挖消土之方分派工員營兵及紳民等各按地段承領工役一舉並作竭數月之力開通南北兩河道引河歸流以免泛濫庶幾一勞而稍獲數十年之利江南

奏疏卷十二

五

善士嚴佑之施少欽陳祝平等募捐施賑力大願宏勞苦經營數十年不倦使之分段經理工程仍聽募捐代賑所領經費必無虛耗工程亦必稍能覈實江南財賦之地逼近河患士民憂懼但聞嚴佑之等經手開工以洩河患必能踊躍捐助不待勸募蓋樂善之心與其求免禍災之心相濟而成人情事勢可以推見仍懇

明諭各督撫臣通籌熟計屏除意見期使軍民人等同懷救災紓難之心至誠惻怛以答天變開濬堵築通力合辦庶使工程盡歸實際亦可限立期程以求迅速截功東南大局幸獲保全允爲

國家無疆之福愚昧之見是否有當伏乞

聖鑒訓示施行謹

奏

初意南北分疏北流仍歸大清河南流舍雲梯關一口無可容納嗣見翁叔平潘伯寅兩尙書疏請開浚大通河引黃河入潮河以達灌河海口取徑較直因潮河故道謂廣濬深亦易爲力旋接陳右銘信謂引河由宿遷西北出劉老澗絕中運河入六塘河以達灌河海口其下卽黑水洋也爲海口最深處所議與兩尙書議合裴樾岑星使亦以爲言嗣見淮安殷子

奏疏卷十二

五

南黃河議其時黃河北徙決侯家林隄灌入南陽湖以至微山湖入中運河卽議開寬劉老澗口門引黃河由六塘河入海正以黃河灌入微山湖舍六塘河無可宣洩也諸君諳知淮南北情形意在蠲淮北兩縣地以保全淮南其議甚備所慮黃河之爲害人皆知之鄭州河決山東人力請規復南河故道惟懼其北行其由北灌入微山湖淮北實受其害引使出六塘河所謂因勢而利導之者也今已南入洪澤湖而使越舊河而北以出六塘河沐陽人必力持之爲距河絕遠引而注之六塘河以使承其災淮北數縣人

民必皆所不願也近聞譚心可述張祀堂之言黃河
入海惟雲梯關一口可以開濬山東各口皆成蘆蕩
疏濬之力無可施雲梯關淤高數丈然決之可使深
濶之可使通所謂爲其事必有其功也張祀堂深諳
河務情形所言爲得其實用所塞決河糜費之半全
力開濬河道必已早著成效區區之意以謂今日天
下大患尤在觀望周章莫肯身任須待 朝廷至誠
惻怛詔諭江南皖豫紳士急籌引河入海之路竭官
民之力爲之必有聞風響應者先求汰除河員氣習
以規圖實效又何功之不可成也 自記

654.78
07424

8689

郭侍郎奏疏

清鄭嵩壽撰

河北省立
天津圖書館

654.78
07424

8689

